

Naqqiut

Taarserpaa siunnersuut ulloq 11. februar 2022-imeersoq

(Naqqiuteqartoqarpoq kukkunersiuinikkut iluarsiisummik inatsisisamut siunnersuummi § 15, imm. 2-mut. Kalaallisuuani oqaatsitigut kukkunersiuinikkullu naqqiummi tamarmi atorneqartumik iluarsiisoqarportaaq)

Uunga siunnersuut: Suliffissarsiortunut ikorsiissutit pillugit Inatsisartut Inatsisaat

Kapitali 1

Atuuffia

§ 1. Inatsisartut inatsisaanni uani pineqarput inuit suliffissaaleqisut sulilernissaminnut piareersimasut.

Imm. 2. Suliffissaaleqisutut sulileriaannaasutut isigineqassaaq inuk suliffeqalernissaminut piareersimasoq, sumoortumillu immikkut suliniateqarfingeqaqqaarani sapaatip akunneranut minnerpaamik akunnerni 20-ini suliffeqalersinnaasoq.

Imm. 3. Suliffissarsiortunut ikorsiissutit aningaasarsiatigut nammineq pisuussutiginngisamik isertitaqannginnermut taartisiatut akilerneqartarput, tamatumani aamma angerlartitaagallarnermi, napparsimanermi aammalu pinngortitami ajunaarnersuaqarnerani.

Imm. 4. Naalakkersuisut ersarinnerusunik tulluarsaqatigiinnut immikkoortitserinarerit pillugit malittarisassiorsinnaapput.

§ 2. Inatsisartut inatsisaanni matumani pineqanngillat inuit namminersortutut inuussutissarsiuteqartut.

Imm. 2. Inatsisartut inatsisaanni matumani pineqanngillat inuit pinerluttaalisitsinermut atatillugu imaluunniit isumaginnittooqarfimmit inissiisarfinnut inissinneqarsimasut.

§ 3. Suliffissarsiortunut ikorsiissutisinissamut pisinnaatitaaneq atorunnaassaaq aningaasarsiatigut isertitaqannginneq pisortani inatsisinik imaluunniit namminersortunut inatsisinik tunngaveqartumik, tamatumani aamma isumaqatigiissutisigut, sillimmasiinernik imaluunniit sulitilluni ajoquusersinnaanermut sillimmasersimanermik tunngaveqartunik isertitaqannginneq matussuserneqartarat.

Kapitali 2

Angerlartitsineq

§ 4. Angerlartitsinertut paasineqassaaq:

- 1) Sulisitsisup sulianik unititsigallarnera ulla 14-it angullugit sivisussuseqarsinnaasumik, nioqqutissiorneq nioqqutissiassaarunnikkut unitsinneqarpat, maskiinat ajoquusernisigut, silamik allamilluunniit siumut naatsorsuutigineq ajornartumik peqquteqartumik.

2) Sulisitsisup sulianik unititsigallarnera toqqaannartumik pisortaniit ilitsorsorneqarnermik imalunniit peqquneqarnermik tunngaveqarpat.

Imm. 2. Sulisitsisoq ingerlaannartumik kommunalbestyrelsimit nalunaarusiusaaq sulisut angerlartinneqarpata, soorluttaaq angerlartitsinermut pissutaasut uppermarsaaserneqassasut.

Imm. 3. Naalakkersuisut malittarisassiorsinnaapput sulisitsisup kommunalbestyrelsimit nalunaarusiortarnissaanut, aamma uppermarsaasiisarnissaanut angerlartitsinermut atatillugu imm. 2 naapertorlugu.

Kapitali 3

Piumasaqaatit nalinginnaasut

§ 5. Suliffissarsiortunut ikorsiissutinik pisartagaqarsinnaaneq tunngaveqassaaq pineqartup 18-inik ukioqalereersimaneranik, aalajangersimasumik najugaqartuuneranik aammalu Kalaallit Nunaanni inuit allattorsimaffiannut nalunaarsimaneranik.

Imm. 2. Inuit Kalaallit Nunaanni aalajangersimasumik najugaqaratik najuuttut, Kalaallit Nunaannilu inuit allattorsimaffiannut nalunaarsimasut aalajangersimasumik najugaqarfegaratik, suliffissarsiortunut ikorsiissutinik pisartagaqarsinnaatitaapput, kalaallinut inuaqatigiinnut aalajangersimasumik atasuugunik.

Kapitali 4

Sulileriaannaaneq, suliffissarsiorneq aamma nuttarsinnaaneq

§ 6. Suliffissarsiortunut ikorsiissutinik pisartagaqartoq sukkulluunniit suliartoqquneqarnissamut piareersimasussaavoq, pisussaaffeqarlunilu suliffissamik innersunneqartumik tigusinissamik, suliffeqalernissamut sungiusaasarernut neqeroorutigineqartartunut peqataasartussaalluni, allamik ilinniagaqartinneqarsinnaalluni, imaluunniit innersunneqartumik pikkorissaqqinnermik tigusisussaalluni, kiisalu suliassamik sulisinnaanermut sungiusartinneqarnermut atatillugu tunniunneqartumik tigusisussaalluni.

Imm. 2. Suliffissarsiortunut ikorsiissutinik pisartagaqartut Majoriami suliffissarsiortutut nalunaarsorsimassapput, eqeersimaartumillu peqataasassallutik communalbestyrelsimiit neqeroorutigineqartunut sulisinnaanngorsaanernut, pikkorissaqqinnernut, allamik ilinniagaqarnermut aamma tamatumunngat atatillugu sungiusaammik sulisarnermut, kiisalu Majoriamut ataatsimiigiaqquneqartarnerni eqeersimaarlutik peqataasassallutik.

§ 7. Suliffissarsiortunut ikorsiissutinik pisartagaqartoq pisussaavoq eqeersimaartutut suliffissarsiortutut nalunaarsorsimanissamut www.suli.gl -imi, naammassillugulu suliaasumik atuutumillu CV-mik peqassalluni.

Imm. 2. Suliffissarsiortunut ikorsiissutinik pisartagaqartoq minnerpaamik sapaatip akunneranut ataasiarluni nalunaarsortittassaaq suliffissarsiortutut www.suli.gl -imi tamanut atuutumik nammineq digitaliusumik ilisarnaatini atorlugu, imaluunniit Qitiusumik ingerlatsivimmi Majoriami nalunaarsortinnermigut.

§ 8. Suliffissarsiortunut ikorsiissutinik pisartagaqartoq suliffisanut inuttaqanngitsunut suliffigissallugu periarfissaqarfisaminnut qinnuteqartarnissamik pisussaaffeqarpoq.

Imm. 2. Suliffissarsiortunut ikorsiissutinik pisartagaqartoq pisussaavoq suliffissami innersuunneqartumi sulilernissamut, ullormik ataatsimik siumut nalunaarfingineqarnermigut. Oqaaseqatigiit siullit aamma atuupput suliffissarsiortunut ikorsiissutinik pisartagaqartumut sulisitsisumit suliffissamik inuttaqanngitsumik neqeroorfigineqartumut.

§ 9. Kommunalbestyrelse qinnuteqartoq peqatigalugu tamakkiisumik isiginntumik nalilersuisassaaq qanoq annertutigisumik qinnuteqartoq sulisinnaanersoq pillugu, minnerpaamik sapaatip akunneranut akunnerni 20-ini, imaluunniit ilinniakkamik aallartitsilluni, tamatumani aamma siumoortumik suliniuteqartoqarsimanissaar pisariaqartinneqarnersoq.

§ 10. Kommunalbestyrelsip suliffissarsiortunut ikorsiissutinik pisartagaqartoq suleqatigalugu sapaatip akunnerisa 4-at ingerlaneranni suliarissavaa inummut pineqartumut iliuusissanut pilersaarusiaq. Qinnuteqartumik suleqateqarnermi isiginiarneqassapput qinnuteqartup pisariaqartitsineri aamma sunniuteqaqataanissaar akisussaaqataanissaalu, iliuusissamut pilersaarummik suliaqarnermut atatillugu.

Imm. 2. Iliuusissanut pilersaarummi piviusorsiortunik anguniakkanik iliuusissanillu nalunaarsuisoqassaaq, siunertaqtunik suliffissarsiortunut ikorsiissutinik pisartagaqartup ilinniagaqarnissamut periarfissaqarnissaanik, imaluunniit suliassatigut - fagitigut piginnaanngorsaqqinnernik ingerlatsinissaanik, pitsangnorsaasunik ikorsiissutinik pisartagaqartup ataavartumik suliffeqalernissaanut periarfissanik, kiisalu pisartagaqartup suliffeqarnermut attaveqarneranik nukittorsaasumik.

Imm. 3. Iliuusissanut pilersaarummi ilaassapput suliffissarsiortunut ikorsiissutinik pisartagaqartup inisisimanera tamakkiisoq, tamatumani aamma ilaqtariinni pissutsit, ineqarneq, nappaatit aamma pissutsit allat qinnuteqartup suliffeqalernissamut periarfissaanut sunniuteqarsinnaasut.

Imm. 4. Kommunalbestyrelse inuuusuttunut 18-29-inik ukiulinnut iliuusissanut pilersaarummik suliaqarnerni pingaartitsisassaaq anguniagassanik aamma iliuusissanik, annertunerpaatigut peqataasinnaasunik qinnuteqartup ilinniagaqarsinnaaneranut, imaluunniit ilinniagaqalernissamut periarfissaanut.

§ 11. Kommunalbestyrelsip iliuusissanut pilersaarummi suliffeerunnermi ikorsiissutinik pisartagaqartoq pisussaaffilissavaa equeersimaartumik peqataanissaanik, tamatumani aamma oqaloqatigiittarnerni, suliniutini pilersinneqartuni, sulisinnaanermik sungiusartitsinerni, inuttut ineriartortitsiviusunik pikkorissartitsinerni, suliassatigut, fagitigut pikkorissartitsinerni aamma suliffissamik innersuunneqartumik tigusisussaaneranik.

Imm. 2. Pisartagaqartup iliuusissanut pilersaarusiaq isumaqatiginngippagu, imaluunniit iliuusissanut pilersaarusiami pisussaaffiliunneqartoq iliuusissaq aalajangersimasoq isumaqatiginngippagu, iliuusissaq pineqartoq taanna Pisortat ingerlatsineranni suliassat

suliarineqartarnerat pillugu Inatsisartut inatsisaat naapertorlugu aalajangiinertut isigineqassaaq.

Imm. 3. Suliami peqataasup tusarniarneqartussaaneranik piumasaqaat taamaattoq atortinneqartussaassanngilaq pisartagaqartup ulluinnarmik sivisunerusumilluunnit ingerlatassanik pisussaaffilerneqartarneraniit isigalugu. Oqaaseqatigiilli siullit taamaattoq atortinneqassanngillat aalajangiineq § 13, imm. 1 aamma imm. 2 naapertorlugu suliaappat.

§ 12. Suliffissarsiortunut ikorsiissutinik pisartagaqartoq pisussaavoq iliuusissanut pilersaarut naapertorlugu naammassillugulu iliuuseqarnissamut. Iliuusissanut pilersaarut nalilersoqqinneqartassaaq iluarsiivigineqartassallunilu pisariaqartitsineq naapertorlugu, minnerpaamik qaammatit pingasukkaartumik.

Imm. 2. Iliuusissanut pilersaarummik suliaqartoqartanngilaq inunnut suliffissarsiortnermut ikorsiissutinik pisartagaqartunut suliffimmiit angerlartinneqarallarnermi, takuuq § 4.

Imm. 3. Naalakkersuisut malittarisassiorsinnaapput iliuusissanut pilersaaruortarnermut, tamatumani aamma suliffissarsiortunut piumasaqaatinik, suliffisanut innersuunneqartunut, sulisinnaanngorsaalluni suliniutinik neqeroorutinut, allamik ilinniagaqartarnernut imaluunniit allatigut pikkorissaqqittarnernut, kiisalu napparsimanermut atatillugu katsorsartinnernut il.il.

§ 13. Inuit 18-29-inik ukiullit suliffissarsiortutut nalunaarsorsimasut qaammatini 12-ini, pisussaapput qinnuteqassallutik tigusissallutilu piffissaq tamaat suliffissamik sumiiffiup angerlarsimaffigisap avataani. Kommunalbestyrelse assigisaanik najukkap angerlarsimaffigisap avataani piffissaq tamaat suliffissamik innersuussisinnaavoq.

Imm. 2. Assigisaanik imm. 1 atortinneqassaaq inunnut 29-it sinnerlugit ukiulinnut, suliffissarsiortutut nalunaarsorsimareersimasunut qaammatini 24-ini.

Imm. 3. Kommunalbestyrelsillu aamma inuk pineqartoq pisussaaffilersinnaava allamik ilinniagaqarnermi peqataasussanngorlugu, sulilernissamut sungiusartitsisarnernut neqeroorutini peqataasussanngorlugu, imaluunniit pikkorissaqqinnissamik allamik innersuussinnaallugu angerlarsimaffigisap avataani, kiisalu pisussaaffilersinnaallugu angerlarsimaffigisap avataani suliassamik tigusinissaanik, sungiusaammik sulisitsinertut innersuunneqartumi, allamik ilinniagaqartitsiviusumi imaluunniit pikkorissaqqinnermik neqerooruteqarfiusumi.

Imm. 4. Imm. 1, oqaaseqatigiit siullit atortinneqassanngillat periarfissaqanngippat inissamik naleqquttumik suliffissarsiortutut pisartagaqartumut, taassuma aappaanut aamma meeraanut angerlarsimasunut 18-it inorlugit ukiulinnut pissarsiniarneq sumiiffimmi pineqartumi. Imm. 3 atortinneqassanngilaq inissiamik naleqquttumik imaluunniit ineqarfissamik naleqquttumik innersuussisoqarsinnaanngippat, suliffissarsiortnermut ikorsiissutinik pisartagaqartumut.

Kapitali 5

Sulinngiffeqarneq

§ 14. Inuk qaammatini imminnut atasuni 6-ini suliffissarsiortnermut ikorsiissutinik pisartagaqarsimasoq, pisinnaatitaavoq isumaqatigiissuteqarnikkut sapaatip akunnerini 2-ini

sulinngiffeqarsinnaanermut, pineqartup suliffissarsiornermut ikorsiissutinik pisartagaqarfifigisinnaasaanik. Sulinngiffeqarneq Majoriamut isumaqatigiissutigineqassaaq, sulinngiffeqalernissaq sapaatip akunnerinik 4-nik sioqqullugu. Sulinngiffeqarneq ingerlanneqassaaq qaammatit tulliuttut 6-it ingerlaneranni. Inuup sulinngiffeqarnermini naammassisimassavai piumasaqaatit suliffissarsiortutut ikorsiissutinik pisartaqartussaanermut, kapitalimi 4-mi sulilernissamut piareersimasussaatitaaneq taamaallaat pinnagu.

Imm. 2. Inuup pineqartup sulinngiffeqarnissani sulinngiffeqarnersiuteqarfiusussaq pisinnaatitaaffigisimaguniuk, sulinngiffeqarneq taanna siulliullugu ingerlatissavaa. Sulinngiffeqarneq tamarmiusoq sulinngiffeqarnersiuteqarfiusoq aamma suliffissarsiornermut ikorsiissutinik pisartagaqarfiusoq annerpaamik sapaatip akunnerinik 2-nik sivisussuseqarsinnaavoq.

Imm. 3. Inuk suliffissarsiortutut sulinngiffeqartutut nalunaarsortissaaq www.suli.gl -imi imaluunniit qitiusumik ingerlatsivimmi Majorami. Inuk pineqartoq suliffissarsiortutut sulinngiffeqartutut nalunaarsorsimanngikkuni sulilernissamut piareersimasutut isigneqassanngilaq.

Kapitali 6

Napparsimaneq

§ 15. Inuk suliffissarsiortunut ikorsiissutinik pisartagaqarsinnaavoq napparsimanermini, kinguneqarallartumik maannamutut sulileriaannaannginnermik. Napparsimanerup nalaani suliffissarsiornermut ikorsiissutinik katersisoqarsinnaavoq napparsimanerit ulluisa pingajuanniit, taamaattoq tak. imm. 3. Sulisinnaanerup periarfissaanngikkallarnerani nappaammik peqquteqartumik ilassusikkanik suliffissarsiornermut ikorsiissuteqartitsisoqassaaq.

Imm. 2. Inuit imm. 1-imi pineqartunut ilaasut, kapitali 4 naapertorlugu piareersimasussaatitaanermiit pisussaaffeqanngikkallartarput. Illassusikkanik suliffissarsiornermi tapiissutinik pisartagaqarsimangunik, piareersimasussaatitaanerat taamaattoq aalajangiusimaneqarsinnaavoq.

Imm. 3. Napparsimaneq sap, ak. 2-nik sivisunerusumilluunniit sivisussuseqarpat suliffissarsiornermut ikorsiissutinik katersineq napparsimanerit ulluisa siullianniit aallartissaaq.

Imm. 4. Suliffissarsiornermi ikorsiissutinik napparsimanerup nalaani pisartagaqarsinnaatitaaneq atorunnaartarpoq imminut ataannartunik piffissami qaammatinik 6-inik sinnerlugilluunniit sivisussusilimmi napparsimareerneremi. Suliffissarsiortunut ikorsiissutinik napparsimanerup nalaani pisartagaqarsinnaatitaanerli pigiinnarneqartarpoq suliffissarsiornermut ikorsiissutinik pisartagaqartinneqartoq piffissap qaammatinik 3-nik sivisussuseqartup iluani naatsorsuutigisinnappagu peqqisisutut oqaatigineqarsinnaalernissi, maannamutullu suliffeqaleqqissinnaalluni.

§ 16. Napparsimaneq kommunalbestyrelsimit nalunaarutigineqassaaq kinguarsaanertaqanngitsumik. Kommunalbestyrelse naliliippat nakorsamiit allagartaq pisariaqartoq, piumasaqartoqarsinnaavoq nakorsamiit uppermarsaammik. Nakorsamiit allagartami nalunaarneqarsimassaaq napparsimaneq piffissami tamakkiisumi imaluunniit piffissap ilaannaani pisunersoq, aamma qaqgu pineqartup nalinginnaasumik suliffissamik tamakkiisumik isumaginnissinnaalernissaa naatsorsuutigineqarnersoq. Nakorsamit allagartamut aningaasartuutit kommunalbestyrelsimiit akilerneqassapput.

Kapitali 7

Killilersuiffigisaalerneq

§ 17. Suliffissarsiortunut ikorsiissutinik pisartagaqartoq sulilernissamut piareersimanngitsoq, tak. §§ 6-13, atorfimminniit soraarniuteqartoq imaluunniit suliffimminniit qimagutitaasut, ikorsiissutisisinnaanermanniit killilersuiffigisaalertarpoq sapaatip akunnerini 4-ani.

Imm. 2. Soraarniuteqarneq tunngavilersorneqarpat sulisitsisup peqqarniitsumik pisusilersorluni atorfefqarnermut atugassarititaasunik unioqqutitsineranik, imm. 1 atuutissanngilaq. Imm. 1 aamma atuutissanngilaq inuup pineqartup eqqartuussinikkut, akerleriissutaasut suliarineqartarfianni aalajangiinikkut, allatigut iliuuseqarnikkut imaluunniit pituttuisuusumik isumaqatigiissuteqarnikkut aalajangiunneqarpat suliffimmiit qimagutitaaneq tunngavissaqanngitsoq. Suliffissarsiortunut ikorsiissutit utimoortumik tunniunneqassapput, tak. taamaattoq § 3.

Imm. 3. Suliffissarsiortunut ikorsiissutit piffissami killilersuiffigisaasumi ikorsiissutinit pisinnaatitaaffittut maannamut tunniunneqartartuniit 50 % -iusarput. Suliffissarsiortumut ikorsiissutinik annikillisitsineq kinguneqartangilaq pisartagaqartup pisussaaffiinik Inatsisartut inatsisaat manna naapertorlugu allannguinernik.

§ 18. Suliffissarsiortunut ikorsiissutinik inuk pisartagaqartoq killilersuiffigisaalersimagine sisamariarluni, qaammatit 12-it imminnut atasut iluanni, taava pineqartoq sulilernissamut piareersimasutut isigineqarunnaassaaq, suliffissarsiortunullu ikorsiissutinik tamakkiisunik pisartagaqarsinnaajunnaassalluni. Inuk pineqartoq suliffissarsiortunut ikorsiissutinik annikillisanik ikorsiissutisissaaq, tak. § 17, imm. 3, pisartagaqarsinnaajunnaarnerup qaangiunneranniit, § 17, imm. 1 naapertorlugu.

Kapitali 8

Suliffissarsiortunut ikorsiissutisisinnaanermik katersisarneq

§ 19. Inuit suliffissarsiortunut ikorsiissutisiassaminnik katersilarsarput ullormiit saaffiginniffimminniit, tak. taamaattoq imm. 2 aamma 3.

Imm. 2. Inuup ulloq saaffiginniffigisani sap. ak. sioqqullugu aningaasarsiaqarnini annasimappagu ulloq taanna tunngavigineqassaaq, ulloq saaffiginniffiusoq pinnagu.

Imm. 3. Inuit akissarsiaqarfigisaminnik suliffeqareersimanngitsut suliffissarsiortunut ikorsiissutinik pisartagaqalersinnaanerminnut katersisarput sapaatip akunnerini 2-ni, kommunalbestyrelsimit suliffissarsiortutut nalunaarnerminniit (ulloq saaffiginniffik)

Kapitali 9

Suliffissarsiortunut ikorsiissutit aningaasartaat

§ 20. Suliffissarsiortunut ikorsiissutit procentiat naatsorsorneqartarpoq sulinermik inuussutissarsiuteqartunut suliamik ilinniagaqarsimanngitsunut isumaqatigiissummi minnerpaamik akunnermusiat aamma sulinermik inuussutissarsiuteqartunut suliamik ilinniagaqarsimasunut akunnermusiat, SIK-ip aamma Naalakkersuisut akornanni isumaqatigiissut naapertorlugu.

Imm. 2. Akiliutissap procentia sapaatip akunnerini 26-ini siullerni minnerpaamik akunnermut akissarsiat 90 % -iannik annertussuseqarpoq. Tamatuma kingorna akunnermusianiit procentiat 80 % -imut apparneqassaaq.

Imm. 3. Inunnut 18-29-inik ukiulinnut suliffissarsiortermut ikorsiissutinik pisartagaqartinneqareersimasunut qaammatini 12-ini, akissarsiat minnerpaaffissaannit procentia 65 % -itut annertussuseqalertarpoq.

Imm. 4. Inunnut 30-inik ukiulinnut ukioqqortunerusunullu katillugit qaammatini 24-ini suliffissarsiortermut ikorsiissutinik pisartagaqareersimasunut procentia akunnermusiat 65 % -ianut annertussuseqarpoq.

§ 21. Naalakkersuisut quppersakkaminni tamanut takusassiarisassavaat § 20, imm. 1-4 naapertorlugit akiliutit annertussusissaat.

§ 22. Suliffissarsiortunut ikorsiissutinik tunniussisoqartassaaq qinnuteqartup akunnermusiaanik tunngavilimmik. Akunnermusiaq naatsorsorneqartassaaq qinnuteqartup agguaqatigiissillugit akunnerit sapaatip akunnerini kingullerni 13-ini suliffissarsiortunut ikorsiissutinik qinnuteqannginnermini suliffigisimasai tunngavigalugit, taamaattoq sapaatip akunneranut minnerpaamik akunnerit 22-it. Annerpaamik suliffissarsiortunut ikorsiissutinik akiliisoqarsinnaavoq sapaatip akunneranut akunnermusiaq akunnernut 40-nut naatsorsugaasoq tunngavigalugu.

Imm. 2. Nalunaaquattap akunnerinut aningaasarsiaqarfiusunut ilaatinneqassapput piffissat pineqartup angerlartitaaffigisimasai, tak. § 4, aamma piffissat qinnuteqartup suliffigisimanngisai kisiannili akissarsiaqarfigisimasai imaluunniit allatigut pissarsiffigisimasai, tamatumani aamma sulinngiffeqarneq akilerneqartoq, ullut napparsimaffiusut akilerneqartut aamma meeqqap napparsimaffia, pikkorissarnernut peqataaneq, nal. ak. akissarsissutissanik afspadseeriineq assigisaaluunniit.

Imm. 3. Inuit sioqqullugu akissarsiorfigisaminnik suliffeqarsimanngitsut suliffissarsiortermut ikorsiissutinik sapaatip akunneranut akunnernut 22-inut naatsorsugaasunik akilerneqartassapput.

§ 23. Siumoortumik qinnuteqarnikkut ilassutitut suliffissarsiornermi ikorsiissutinik tunniussisoqarsinnaavoq, piffissap ilaannaani suliffeqarnermi annerpaamik sapaatip akunnerinik sisamanik sivisussuseqartuni, piffissap qaammatinik tulleriinnik arfinilinnik sivisussuseqartup iluani.

Imm. 2. Illassutitut suliffissarsiornermi ikorsiissutit piumasaqaatitaqarput ikorsiissutinik tigisisussap sulilernissaminut piareersimanissaanik, tak. kapitali 4.

Imm. 3. Piffissaq suliffissarsiornermi illassutitut ikorsiissutinik pisartagaqarfiusoq tigisisussap iliuusissanut pilersaarutaani ilaariissaq, siunertaqassallunilu pineqartup aalajangersimasumik suliffeqalernissaanik.

§ 24. Suliffissarsiortunut ikorsiissutinik pisartagaqartartoq ulluni ataasiakkaani akissarsiortarsimappat, suliffissarsiornermut ikorsiissutit annikillineqartassapput nalunaaquttagut akunnerinik aningaasarsiorfiusunik.

§ 25. Suliffissarsiortunut ikorsiissutit kingumoortumik tamatigut ullut 14-ikkaartumik akilerneqartassapput. Suliffissarsiortermit ikorsiissutit communalbestyrelsimit kommunimi sulinermik inuussutissarsiuteqartup inuit allattorsimaffianni nalunaarsugaavigisaani akilerneqartassapput.

Imm. 2. Kommunit agguernerisa avataaniittunut inunnut naalakkersuisoqarfik sulisoqarnermut akisussaasusoq suliffissarsiornermut ikorsiissutinut aningaasartuutit ingerlatissavai, tak. § 30, imm. 2.

Kapitali 10

Qanoq sivisutigisumik suliffissarsiortutut inissisimaneq

§ 26. Suliffissarsiortutut qanoq sivisutigisumik inissisimaneq naatsorsorneqartassaaq siullermeersumik suliffissarsiornermi ikorsiissutinik akiliisoqarneraniit, piffissamut suliffissaaleqisup suliffissarsiornermi ikorsiissutinik pisartagaqarunnaarfisiaanut, suliffeqalernermik pissuteqartumik. Nutaamik suliffissarsiortunut communalbestyrelsimi nalunaarsorsimaleqqinnermi, suliffissarsiortoq nutaamik nalunaartutut nalunaarsorsimalissaaq, tak. taamaattoq imm. 3.

Imm. 2. Imm. 1 naapertorlugu qanoq sivisutigisumik suliffissarsiortuuusimanerup naatsorsorneqarnerani ilanngunneqassaaq piffissaq ilassutitut suliffissarsiortumut ikorsiissutinik akiliuteqarfiusartoq.

Imm. 3. Suliffissarsiortutut ikorsiissutinik pisartagaqartoq nalunaarsimappat suliffissarsiortuujunnaarluni, taavalı suli sapaatip akunneri 12-it qaangiutinngitsut nutaamik suliffissarsiortutut communalbestyrelsimit nalunaarluni, pineqartoq nutaamik nalunaartutut isigineqassanngilaq. Suliffissarsiortorli suli suliffissarsiortutut allannguuteqanngitsumik sivisussusilittut nalunaarsorsimaannassalluni imm. 1 malillugu.

Kapitali 11

Paasissutissiinissamut pisussaaffik

§ 27. Suliffissarsiortutut ikorsiissutinik pisartagaqartoq pisussaavoq kommunalbestyrelse ilisimatittassallugu atugarisamini allannguutit suliffissarsiornermut ikorsiissutinik pisartagarisaminik allannguutaasinnaasut pillugit, atorunnaarsitsisinjaasut imaluunniit utertitsilluni akiliuteqartussanngorsinnaanermut pissutaasinnaasut pillugit.

§ 28. Kommunalbestyrelse siumoortumik qinnuteqartumiit imaluunniit ikiorneqartumiit akuersisitsereernikkut piumasaqarsinnaavoq pisortatut oqartussaasut allat pineqartoq pillugu paasissutissanik tunniussaqassasut, suliffissarsiortutut ikorsiissutinik tunniussisinnaanermut suliap suliarineranut pisariaqarsinnaasunik. Tamanna aamma atuuppoq ilinniartitaanernut ingerlatsivinnut, napparsimmavinnut, nakorsanut, tarnip pissusaanik immikkut ilisimasalinnut, peqqinnissamik suliaqartunut akuerisaasunut allanut, aamma inunnut pineqartunut akisussaasunut sinnerlugulu sulisunut, aningaaserivinnut, sulisitsisunut aamma namminersortunut pisortat ingerlatsiviinik sullissiuusunut. Tamannalu aamma atuuppoq paasissutissanut inummut pineqartumut taamaallaat tunngasuusunut atatillugu, aammalu paasissutissanut isortuussaasunut tunngatillugu, soorluttaaq pisortat nakorsap pineqartumut allattugaataanik, napparsimmaviup allattugaataanik imaluunniit tamakkua anillatsinneqarnerinik piniarsinnaasut.

Imm. 2. Kommunalbestyrelsip pineqartumit akuerineqaqqarani suliami ataatsimi suliamut atatillugu imaluunniit nakkutilliinermut atatillugu piumasarisinnaavai paasissutissat pisortatut oqartussaasunit allaniit, aningaasanut tunngasuni aamma sulinngiffeqartarnermut tunngasuni, pineqartumut ikiorserneqarnissamik qinnuteqartumut atatillugu.

Imm. 3. Kommunalbestyrelsip innuttaasumit akuerineqaqqarani piumasarisinnaavai paasissutissat pisariaqartut aningaasaqarnermut attuumassuteqartut aningaaserivinniit aamma sulisitsisuniit, suliffissarsiortumut ikorsiissutinik nakkutilliinermut atatillugu.

Imm. 4. Qinnuteqartoq akuersinngippat kommunalbestyrelsip paasissutissanik piniarsinnaaneranut imm. 1 naapertorlugu, suliaq paasissutissat pigineqartut tunngavigalugit suliarineqassaaq, paasissutissat pineqartut, tak. imm. 2, akuersissutitaqanngitsumik aaneqarsinnaanngippata.

Kapitali 12

Utertitsilluni akiliineq

§ 29. Kommunalbestyrelse aalajangertussaavoq eqqunngitsunik tunngaveqartunik ikorsiissutinik tunniussisoqarsimanagerani, Inatsisartut inatsisaat manna naapertorlugu utertitsilluni akiliinissamik, imaappat, ikorsiissutinik pisartagaqartoq:

- 1) Kommunalbestyrelsimum paasissutissanik apuussinaveersaarsimappat, tak. § 27.
- 2) Pissutsit nalunngikkaluarlugit Inatsisartut inatsisaat manna naapertorlugu ikorsiissutinik tigusaqarsimappat.
- 3) Kingusinnerusukkut taarsiissutissanik akiliivigineqarsimappat, ikorsiissutinik allaniit akilerneqarsimappat assigisaanilluunniit aqquasaagaqarsimappat, piffissami

suliffissarsiornermut ikorsiissutinik pisartagaqarfiusimasuni siunertaasunut naapertuuttunik akilerneqarsimasunik.

Kapitali 13

Aningaasalersuineq aamma allaffissorneq

§ 30. Kommunalbestyrelsip Inatsisartut inatsisaat una tunngavigalugu suliassanik allaffissornikkut ingerlatsineq isumagisaraa.

Imm. 2. Inatsisartut inatsisaat una naapertorlugu ikorsiissutinik pisartagaqarnissamut qinnuteqaat kommunimi aalajangersimasumik ineqarfigisami, imaluunniit aalajangersimasumik najukkami, tunniunneqassaaq. Inuit kommunit aggorneqarsimanerisa avataani aalajangersimasumik najugaqartut qinnuteqaammik Naalakkersuisunut tunniussisussaapput.

Imm. 3. Inunnut nunap kommuninut aggorsimanerisa avataaniittunut Naalakkersuisut piginnaatisisisinnaapput pisortatut oqartussaasunik allanik Inatsisartut inatsisaata matuma atortinneqarneranut atatillugu.

§ 31. Inatsisartut inatsisaat manna naapertorlugu aningaasartuutit kommunalbestyrelsimit akilerneqassapput. Aningaasartuutit inunnut § 30, imm. 2, oqaaseqatigiit aappaat naapertorlugu pineqartunut Naalakkersuisunit akilerneqassapput.

Imm. 2. Suliffissarsiornermut ikorsiissutinik pisartagaqartoq kommunimiit nuuppat iliuusissanut pilersaarummik suliaqartoqareernerani, kommunip nuuffiusup iliuusissanut pilersaarusiaq kommunimut qimatamut piniassavaa, naleqqussassallugulu taanna pisariaqassusia naapertorlugu, suliffissarsiornermut ikorsiissutinik pisartagaqartoq kommunimi nuuffigisamini saaffiginnippat. Kommuni qimanneqartoq iliuusissamut pilersaarummik kommunimut nuuffiusumut nassiussaqassaaq, tamanna piumasarineqarniariarpas.

Kapitali 14

Ataatsimoorussanik IT-mi aaqqissuussinerit

§ 32. Kommunit aamma Naalakkersuisut ataatsimoorussaminnik IT-mut atatillugu atortorissaaruteqassapput, Inatsisartut inatsisaat manna tunngavigalugu allaffissornerminni atugassaminnik.

Kapitali 15

Naammagittaalliuutit

§ 33. Kommunalbestyrelsip Inatsisartut inatsisaat una naapertorlugu aalajangiineri suliassanngortinnejarsinnaapput Isumaginninnikkut Maalaaruteqartarfimmum, Isumaginnittoqarfiup aqunneqarnera aaqqissuussaaneralu pillugit Inatsisartut peqqussutaanni aalajangersakkat naapertorlugit.

Imm. 2. Kommuninut nunatta aggorneqarnerisa avataanni inunnut aalajangersimasumik najugaqartunut imaluunniit najugaqarallartunut tunngatillugu aalajangernerit Naalakkersuisunit imaluunniit Naalakkersuisunit piginnaatinneqartunit suliarineqartut Isumaginninnermut Maalaaruteqartarfimmut suliassanngortinnejarsinnaapput.

Kapitali 16

Atortuulernera aamma ikaarsaariarnermi aalajangersakkat

§ 34. Inatsisartut inatsisaat una atortuulerpoq ulloq 1. januar 2023.

Imm. 2. Ilutigisaanik atorunnaarsinneqarpoq Suliffeerunnermi ikorsiissutit pillugit Inatsisartut inatsisaat nr. 2, 15. maj 2014-imeersoq.

§ 35. Inuit Inatsisartut inatsisaata matuma atortuulernerani suliffeerunnermut ikorsiissutinik pisartagaqartut ingerlaannartumik suliffissarsiornermut ikorsiissutinut nuutsinneqassapput, Inatsisartut inatsisaanni uani aalajangersakkat naapertorlugit.

Imm. 2. Iliusissanut pilersaarutit atuuttuusut Suliffeerunnermut ikorsiissutit Inatsisartut inatsisaat nr. 2, ulloq 15. maj 2014-imeersoq naapertorlugu, allannguuteqaratik Inatsisartut inatsisaat una naapertorlugu atortinneqassapput. Kommunalbestyrelse Inatsisartut inatsisaata matuma atortuulerneraniit ukioq ataaseq qaangiutsinnagu iliuusissanut pilersaarutinik nutarteraluni malinnaatitsisassaaq, inunnut suliffeerunnermut ikorsiissutinik pisartagaqarsimasunut suliffissarsiorermilu ikorsiissutinik pisartagaqalersunut.

Namminersorlutik Oqartussat, ulloq

Naalakkersuisut Siulittaasuat